

山 鍾 鑪
夷 卬 卣

丙午夏五伊熙績署檢

伊熙績鑒定
蘇紹柄編輯

山鍾集

蘇本
廉炎校字
徐揆大署贈

光緒三十二年七月再版

光緒三十二年八月發行

每部四冊實洋六角

上海鴻文書局印刷

覺覺社發行

山鐘集

煙台同志社愛國軒之眾書室同人

此次抵制美約誠爲我國空前絕後之一大提議賴公屢次登高大聲疾呼凡我同胞稍有天良者莫不響應觀各報登各埠之會議足見實心熱力欽佩無量煙台一埠亦曾集議數次未能一律實行如廣幫□□號代理之美孚油銷路較昔倍加本幫之□□□復與□□號之某某訂立合同包銷火油若干藉此壟斷（中略）敝社因擬訂期大會諸董集議此事用據近聞先行上告

廈門鄭禮榆

羅氏杏農由粵城回廈備述粵垣抵制美約人心鼓動演說繁興各演員觸類引伸周詳譬喻令我數千年之中國如夢初醒無論小巷大街男婦老幼一聞開講環聽無譁及聞人羣切要之言甚有潸然涕下或冠髮直衝者而說者默察人情慮生事端更進一解勸以舉動文明萬不可野蠻暴動衆復肅然推原其始非皆我公提倡之力有以致之哉（中略）廈關鬧事實與抵約無干蓋由常關積怨所致知勞塵念

合亟奉聞

陸有源

旅美華僑受虐已久近日始有公等出爲援手倡議停銷美貨以爲抵制禁約或能轉機吾公見義勇爲凡屬僑民莫不同深焚頂（中略）茲呈淺見五條聊盡國民一分子義務是否可行尙希核奪（條略）

周卓如陳綽如吳傳卿

美約苛虐大背公理凡具熱血莫不切齒痛恨攘臂爭先各盡同胞一分子之義務敵處台州風氣尙形閉塞除統才學堂全體不用美貨外現復運動有力紳商互相勸戒以副執事提倡之盛心以全國民固之有人格（後略）

衢州青年社代表人崔嵬

閱初四報章有美約已一律改良優待華工並及學生遊歷人等之語又閱貴總會告白云俟有優待之實據方可除此問題云云識見高超誠熱心愛國愛種者之言也彼美外交手段斷非我國所能及若未見施諸實行而貿然從之恐不免事成畫

餅也況禁華工之舉倡於彼國之工黨若未得其王黨領袖之簽押能保其不另生枝節乎（後略）

鳧山後學王葆鍊書

美禁華工虐我黃種文明抵制賴公發起登高一呼山谷俱應是上蒼不滅我黃族獲生我公挺出其間此豈僅海外華僑感恩頌德已哉葆於神州大陸亦屬個人一分子應盡義務敢承公志終始不用美貨並勸我親戚故舊激我友朋示我僮僕一律相戒逢人便說盟誓不渝存諸懷抱宣諸唇舌（後略）

蕭濟川

閱時報登明公留別同胞一則未讀竟已有如賈長沙之痛哭流涕者三夫以美頒苛例虐待華人祇因國弱無能爲力國民不知團結且無人起與之爭故任其爲所欲爲耳今幸明公與商務總會諸公奮起而籌抵制之方以不買賣美貨爲宗旨辦法文明所以一倡而四方響應者兼以日久積憤不平之所致也不意同胞之團體方堅而羣小之詭謀忽露乃有閉門私議圖害吾公者是誠何心哉真狗彘之不若

矣（中略）明公何人也大德人也中庸云大德之人必得其壽公可當之孔子云天之未喪斯文也匡人其如予何公乃似之然則公之爲公豈二三僉壬所能加害哉（後略）

四川留東學生鄧孝可

讀西七月下旬連日東報我國此次對美之情遂令外人顛倒至於此極噫何意我民族今竟能如此噫何爲我民族乃至今而僅能如此感愴鼓蹈喜極而悲亟思有所奉獻以表禱佩之誠而窮寰球之品彙無足表五內之熱衷者惟時正值美國大統領盧斯福之女公子過日日人傾國歡迎注意之點尤在成一花圈以獻因探其製造所出得其原工模範前形花葉相對成此記念今特奉上讀報知各埠所匯抗美正款公皆舉而還之公皎如白日之心直可質鬼神而示萬衆所上區區微物不足當公之一唾雖然可願舉此日本全體迎美之花圈奉獻於我全體抗美君子之前者非於公則可區區微忱無由鳴也物雖微赤心也望公舉此赤心以表告於大衆今茲時勢一變情事日急爲告有五體感佩者目縈心戰據地拜祝請以堅持此

最後之一着嗚呼此戰戰慄慄如驚如寵無量歡喜無限憂慮無任禱祀無窮希望之心四萬萬同胞中懷之而不鳴嗚之而不聞者尙不知幾何千百也可一思之則爲之起舞激昂泣數行下花圈也赤心也願舉此以獻者奚獨可哉奚獨可哉

長沙廣幫同人

美虐華僑公倡抵制於二十年外族之苛待三十萬旅民之甘忍四百兆同胞之旁觀當軸諸公之無策挽回爲足下一言道破義聲所播羣起和之足下之名於是乎著所謂不鳴則已一鳴驚人也僕等深以未得識荆爲憾（中略）湘省離申較遠雖有報章得信頗遲此邦人士及旅居紳商於七月廿一日借浙江會館集議演說到會者千人敝幫復於廿七日在敝會館集議以表同情而附驥尾嗣後每逢星期集會一次矢以堅持到底務至廢約爲止如荷惠函請寄長沙南門外大成公司

瓊州海口商務局

敝港於七月十六日開議停辦美貨不約而至者數百人各業簽名者十已有九足見公憤所在遠近皆同合亟馳報尙望互爲聲援實力舉行堅持到底

埭溪發蒙學堂蔡綠農

君之熱誠歷史屢見報端欽佩靡既抵制禁約不用美貨埭溪各學界自五月廿三日起早已一律遵行商界亦甚贊成足見君之熱心提倡影響所播卽區區埭溪小鎮亦無不波及尤足徵我國全體之羣表同情也惟美孚洋油一種頑固社會以其質少煤氣用之既慣且久每多戀戀不捨刻接杭友許君則華來函云杭城改用各種新牌洋油初亦以其多煤氣覺不甚便後乃探得一法先將燈帶入醋沉浸半日再取出晒乾用之可免多大煤氣爰卽如法試行屢試屢驗用特請君轉致報館將法登報俾用洋油者均沾其便想彼頑固社會當亦知所變計已

譚國忠

（前略）吾公領袖抵制美約不遺餘力與旅美十餘萬同胞作生活爲吾華四百兆黃種爭光榮毅力熱誠率土欽佩兩月以來漸著成效此後美約改良皆賴閣下旋乾轉坤之大力凡身受其惠者甯不馨香禱祝哉（後略）

黃賀元

美禁華工公憤同伸咸遵先生文明辦法以不買美貨四字堅守到底工約一日不改我國民團體一日不散先生視死如生他日美約改良銅像巍然直立于雲表者非先生其誰邪

紀王廟鎮淞南小學堂特班學生張逢吉陶精禮陸振綱黃自強陳逢恩張其祥吳元勳陸文璽凌榮泉陳則韓陶精義陳逢澤

自公提倡抵制美禁華工中原豪傑聞風響應商學二界尤爲團結渺小紀鎮黃口稚子風聞奸商有欲不利于公者無不毛髮卓立誓欲得而甘心因於七月廿一日特開童子會不期而至者百餘人有願爲公繼起者有誓爲華工復讐者雖年方童齠亦無不激昂慷慨有視死如歸之氣象抑何令人興起一至于此童子且然而況天下奇傑之士中國之興舍公其誰興歸公其勉之以副人望勿謂童子何知而不屑教誨之裁成之則幸甚

邳州竇鑄我

拒約之事近來忽生阻力同人深爲憂慮尙乞我公堅持定見以固衆心萬勿稍懈

遽使團體解散再貽笑於外人也且茲事雖爲禁約而發然中國轉弱爲強亦在此舉其關繫正非淺小惟吾公圖之

常德商會代表李廷鏞

抵制美貨華商應盡義務常郡爲湖南西路一大商埠自應一律舉行現在宣佈傳單衆皆響應將來不致有負提創之苦心現擬推行西路以冀萬衆一心堅持到底

蕪湖廣肇公所

本公所於八月廿五日特別集議抵制美禁工約到者比前兩次更衆先由唐達臣君發明開會宗旨次由張蘭生君宣述此次朝廷恐抵制過於激烈深防無知藉端生事故下詔諭不得已之苦衷天下臣民共應深諒但旨意係禁野蠻暴動非禁文明辦法尙望諸君始終謹慎堅持以免外人益鄙夷我等繼爲崔子衡君演說略謂不用美貨國民各行其是官府所難禁止務祈忍耐堅持到底不愁無效試觀梁欽使之電可知總望互相勉勵勿爲敗類所惑遽散團體致使外人更不以人類視我隨後呂善甫蔣星河李硯耕鍾瑞廷唐耐修杜輔廷梁吉行諸君次第演說

所陳更覺切實痛快聽者大爲感動竟有聞而流涕者故拍掌之聲不絕於耳皆稱若不廢約抵死不用美貨迨散會時已日薄崦嵫矣

睢寧縣商會同志人

(前略)不用美貨實文明抵制之最上乘閣下倡之必能堅持到底爲吾四萬萬同胞吐氣也敝邑亦已一律不用美貨遵章辦理(後略)

浙江蘭谿徽商江鎮周

實行抵制美約敝處於六月間接奉浙省傳單早經遵照辦理日前由杭州某錢莊分送來抵制美約會奉勸同胞不買美貨編成白話一單其文淺而明粗知文字者即能入目了然僕卽連夜趕抄八分粘於要道時因金華府試各縣學界皆由此間經過此時又值八月十三日方岩進香之時方岩爲金衢嚴第一勝境三府屬之人每年秋收後皆往進香魚貫而來亦由此過日必數百人凡見此單人人動憤共表同情此間商會已立不日即將開會集議舉定代表人當再奉書左右也

漢鎮同會社人等

抵制美約寓漢各幫莫不協力同心茲聞黃陂街太平幫□□某執事貪利反對近購美國老牌煤油三萬箱衆意似此違章後日難免虎頭蛇尾之譏而於大局關係不小爲亟據情上聞尙乞吾公核奪示遵（後略）

嘉興新豐鎮士商

讀公留別同胞書已逾月矣而公竟安然無恙想見身繫全局天固不忍遽戕亦我四萬萬同胞之幸福抵約不用美貨敵鎮於本月初八及二十日兩次開會集議各商一律簽名極願贊成嗣後不再賣買美貨

燕北閒人

閱報章讀公留別書而慨然有感曰臨大節而不可奪君子人與君子人也我朝忠厚開基二百餘年養士之報得人之慶兆端於此我公以一腔熱血灑向同胞震動全球炳耀今古凡有血氣者莫不振興起舞足見人心未死惜無爲之提倡者耳（中略）迨至衆志成城風行草偃民智日進團體益堅轉弱爲強斯東亞有承平之象追溯振起之功非公其誰屬哉（後略）

龍游拒約社同人

美約一事關係甚重公以不用美貨爲抵制各埠咸表同情敝邑雖僻處萬山中然亦我華之一部分豈敢自低人格爰於八月十日遍發傳單邀集學商界同志於中秋日假座邑廟籌商辦法屆時各同志先後蒞至當卽鳴鐘開議先由程君振華宣佈宗旨後由曾君繩祖章君毓卿程君志鴻李君佐卿胡君印溪次弟演說大旨爲美虐華民慘無人理若不共籌抵制何以對我同胞聞者爲之淚下是日學界到者七十餘人商界一百五十餘人均各簽允現下市中美貨已將絕跡（後略）

岑清泉

美設苛例虐待華工慘無人理廿載於茲乃四百兆羣生竟無一人思議設法抵制者惟我公倡之以相戒不用美貨爲宗旨辦法文明團體固結功莫大焉（餘略）

淮北西埧鎮鹽務同人黃亦香等

抵制美約願爲同胞犧牲其身公員大丈夫哉僕等僻處西埧世業淮鹺謹感熱忱邀集同人開會演說戒用美貨共表同情堅持到底改約後已

歸安張小屏

讀出師表而不動心者其人必不忠讀陳情表而不動心者其人必不孝讀公留別書而不動心者其人必不義溯自籌抵禁約以來忽焉明禁忽焉暗算忽焉和平解散種種障礙一日千變華盛頓南北戰征之役未有如此困難者（中略）所望堅持到底同人各盡天職以完全此一樁公案然所謂天職者不過相戒不用美貨六字而已事極易爲人人牢記（後略）

蘇州方義敦代江蘇全省同胞

閱各報章日載各埠集議抵制函電紛馳累牘盈牘如春草向榮蓬蓬勃勃方興未艾民族發達團體益堅皆公提倡之力也自四月十七決議抵制獨公見義勇爲領銜傳電不辭嫌怨不避艱險數與美領事磋商辨難不激不隨不亢不卑深合文明辦法早爲各國所公許及讀公留別書激昂慷慨悲壯淋漓何物狂奴不顧公理欲害吾公解散全體破壞大局不禁拍案叫絕怒髮冲冠雖然人誰無死惟視死者之何如耳古來富貴而名磨滅沒世而文不彰者抑亦多矣今公爲四百兆民之犧牲

振五千餘年之聾瞶孔曰成仁孟曰取義不亦壯哉乃者感公高義願繼公起樂爲公死者風從雲合實繁有徒彼冥頑不靈者當之計必窮矣尤願我同胞堅持終始百折不回莫貽進銳退速之誚斯爲萬幸

廣東香邑歐天和

美欺華工獨出苛例公倡抵制不用美貨凡我同胞團體宜堅終始勿渝庶收改約之效果（餘略）

醉臥笛樓聽潮生

不用美貨已徧各省若能遵守堅持民心團結不第抵制美約並可藉此自強（中略）煙台招商局總辦李君順泰錢莊梁君原籍嶺南久居齊魯任事熱心久爲商界所欽佩若得執事致函聯絡東省團體無慮破壞矣（後略）

旅越南輿論一分子

抵制苛約之舉薄海內外悉表同情人心不死中國庶幾有亨矣夫行個人之自由足以洩一羣之公憤報復之理既不容辭勝負之數亦最易見苟非平旦之良漸滅

至盡未有不樂與贊成者也（中略）抵約一事始集議于西貢不意爲商務總董所反對越數日再集議于堤岸總董不至但遣□□出而詰難多端卒以公論難誣爲有識者關其口而奪之氣詢謀僉同將合衆畫諾佈告實行矣突有西官二員直入議事所究問集議之由同人爰以正對西官卽諭令寢息此事且諄囑勿輕舉妄動致干本便而後去同人乃罷畫諾惟以堅持此議互相勗勉而散自數十年來議事所之集議奚啻千百次從未有西官過而問焉者茲之突如其來果誰告之而誰使之乎（後略）

泉塘陳穉卿

美虐華工普天共憤相率繼起萬衆一心（中略）不用美貨抵制苛約堅茲團體不難轉弱爲強苟能普勸天下凡屬洋貨悉屏不用以免金錢流出外洋則更可轉貧爲富當海禁未開以前中國人民初未嘗以洋貨是賴乃貪利忘義之徒竟以不銷美貨甚欲圖害吾公冀壞大局是真全無血性者矣（後略）

歐陽柱石芝